

四庫全書

集部

欽定四庫全書

宋詩紀事卷十五

錢塘厲鶚撰

李大臨

大臨字才元成都華陽人寶元元年進士累官  
祕閣校理神宗朝除知制誥天章閣待制

西園辨蘭亭和韻

沙石香叢葉葉青卻因聲誤得蟬名騷人佩處唯荆渚  
識者知來徧蜀城消得作亭滋九畹便當入室異羣英

非逢至鑒分明說汨沒人間過此生

成都文類

題招提院靜照堂

地勝常新構僧閒畫杜門山林誰樂靜城市亦非喧客

引空彈指風來不動幡祇應常宴坐對境一無言

至元嘉禾

志

謁濂溪周虞部

簾前翠靄逼廬山門掩寒流盡日閒我亦忘機澹榮利

喜君高躅到松關

廬山志

周孟陽

孟陽字春卿其先成都人徙海陵第進士英宗朝累官集賢殿修撰同判太常寺神宗立拜天

章閣待制

孫公談圃周孟陽春卿英宗宮僚聖眷素厚書簡以老丈稱之當議儲副時英宗固辭春卿就臥內諭意上大悟拜春卿牀下遂正儲位裕陵在東宮朝廷復以春卿為翼善春卿為人純直謂不當為父子宮僚上表力辭有親奉堯言躬承禹拜之句

題招提院靜照堂

羨師遺世網舊隱敞新堂月白秋庭小風清晝磬長遠  
遊輕勢利歸夢在滄浪滿篋朝賢句孤雲出帝鄉

至元嘉禾

志

句

地高多與風雲會天近常為日月鄰

遊徑山話

梅礪詩

閻詢

詢字議道鳳翔天興人第進士又中書判拔萃  
科神宗朝歷右諫議大夫提舉上清宮

題招提院靜照堂

浙右僧居盛虛堂葺有功  
迷來隨萬化淨後照三空  
夜永松軒月秋深竹岸風  
我心閒已久夢到水鄉中

至元嘉禾

林億

題招提院靜照堂

攜李湖山外招提煙靄中  
靜由諸漏盡照覺萬緣空  
馬祖傳懷海牛頭住法融  
誰來訪宗旨現定即家風

至元嘉禾

志

張宗永

宗永華州人寶元中知建安縣

題陳相別業

喬松翠竹絕纖埃門對寒山盡日開應是主人貪報國  
功名遂不歸來

墨客揮犀宗永嘗以事失鄭州陳相意陳公有  
別業在鄆杜閒宗永知公好絕句詩乘閒詣之  
于壁大書二韻莊督錄以聞公覽而善之待之  
如初

句

大書文字隄防老剩買峯巒準備閒

倦遊雜錄

雷簡夫

簡夫字太簡邵陽人康定中杜衍薦之以校書郎簽書秦州觀察判官累遷尚書職方員外郎

寄甘露舒公上人

成都多少寺梵學競推能到老不破戒滿城唯此僧池  
龍聽夜講海客施年燈別後空相憶塵勞正可憎

成都文類



元居中

居中錢唐人康定中台州守至太常少卿

風水洞上祖龍圖無擇

洞蔽深雲遠俗塵山中曾未識朱輪自從白傳來遊後

五百年閒又一人

咸淳臨安志

蘇頌

頌字子容南安人紳之子徙居丹陽慶厯二年

進士神宗朝歷集賢院學士知開封府哲宗即

位累遷翰林學士拜右僕射兼中書門下侍郎  
罷為集禧觀使徽宗立進太子太保累爵趙郡

公卒贈司空魏國公有集

送朱郎中壽昌通判河中

邶風詠凱風以成孝子志鄭人復君母傳稱能錫類中  
郎常有懷生不識所恃登朝雖厚祿當食每忘饋念昔  
鞠育勞嗟今出處異倚門豈不待兩求終莫致乳烏思  
反哺哀鳴自垂翅百草搖春暉寧無謝生意灑血向穹

壤解組出臺寺馳驅咸雍郊歷訪經行地至行感神明  
精誠通夢寐悠悠大道傍親息忽相值紫綬拜北堂白  
頭歸長嗣悲忻叙契濶恍如隔生事四紀世路殊一朝  
版輿侍茲事昔未有聞者共驚喟帥守為之言詔趣還  
官次當年二十石寵名非所利仕或便鄉關安用竹符  
使蒲中母家近自屈為倅貳受命慰慈顏騰裝愜歸思  
既徇報德心亦安效官智觴以萬壽薦衣成五綵戲無  
復興寒泉何須賦大隧今人及聖善孝慈兩不匱贈言

述高風庶用激忠義

次韻蔣穎叔同遊南屏見惠長篇

青山橫莽蒼萬石出南麓古刹表耆閣高聲聳羣玉居  
惟擇岡巒近靡數松竹郡郭路非遙遊人春不宿陟巘  
極躋攀循崖勞偃伏架筒引流泉跨嶺構重屋講坐據  
妙峯禪堂對枯木幽尋難屢期將往誰能獨偶逢霜臺  
客暫駐驄馬足聯步訪叢林終朝走郊牧相期方外遊  
頓忘河上曲夷路喜君騰高閣暫予東更聽名理言俯

愜心中欲況已證真常詎止齊寵辱願言挹清風可用  
弊言浮俗

贈同事閣使

以下二首使北時作

山路盡陂陀行人涉險多風頭沙磧暗日上雪霜和草  
淺鷹飛地冰流馬飲河平生畫圖見不料此經過

奚山路

出奚山路入中京界道旁店舍頗多人物亦衆

行盡奚山路更賒路旁時見百餘家風煙不改盧龍  
俗

唐盧龍節度兼押契丹使

塵土猶兼瀚海沙朱板刻旗村肆食

食邸門挂  
木刻朱旗

青氊通幃貴人車

貴族之家車屋  
通以青氊覆之

皇恩百

歲加荒憬物俗依稀亦慕華

暮春與諸同僚登鍾山望牛首

清明天氣和江南春色濃風物正繁富邦人競遊從官  
曹幸多暇交朋偶相逢并驅出東郊乘興遊北鍾陟險  
不蠟屐扶危靡揅筇上登道林祠俯觀辟支峯亂山次  
阡陌長江遠提封蕭條舊井邑茂盛新杉松攬物思浩  
然懷古心顚顚念昔全盛時茲山衆所宗天都對雙闕

霸業基盤龍六朝遞興廢百祀居要衝人情屢改易世事紛交攻當時佳麗地一旦空遺蹤唯有出岫雲古今無變容

和題李公麟陽關圖

三尺冰紈一絕詩翩翩車馬送行時尊前懷古閒開卷看盡關山遠別離

以上魏公集

和右僕射劉公莘老夜直中書省見寄之什

五年班綴望夔龍曾託幘幪庇雨風末路自憐黃髮老

早時曾識黑頭公，升沈不改交情見。  
出處雖殊，趨舍同謾叩蕪音。  
答高唱，終慚下管應清宮。

卻埽編

即席獻文潞公

高燕初陪聽拊鼙，清談仍許奉揮犀。  
自知伯起難逋峭，不及淳于善滑稽。  
舞奏未終花十八，酒行先困玉東西。  
荷公德度容狂簡，故敢忘懷去町畦。

卻埽編熙寧間蘇丞相奉使契丹，道過北京時，文潞公為畱守。燕會款洽，文公因問魏收有逋峭難為之語，何謂？蘇公曰：聞之宋元憲公，蓋梁上小柱名，取有曲折之義耳。蘇公以文人多用。



近語而未及此乃用為一詩紀席上事獻文公云

春帖

璇霄一夕斗杓東  
淑艷晨曦照九重  
和氣薰風摩蓋壤

競銷金甲事春農

宋藝圃集

王安石

安石字介甫臨川人慶厯二年進士神宗朝累  
除知制誥翰林學士拜同中書門下平章事加  
尚書左僕射兼門下侍郎封荊國公卒謚曰文

崇寧閒追封舒王有臨川集

蒙齊筆談荆公初生家人見有權入其產室故小字權郎

後山詩話魯直謂荆公之詩莫年方妙然格高而體下如似聞青秧底復作龜兆圻乃前人所未道又云扶輿度陽焰窈窕一川花雖前人亦未易道也然學三謝失於巧耳

石林詩話蔡天啟言荆公每稱老杜鉤簾宿鷺起九藥流鶯轉之句以為用意高峭五字之模楷他日公作詩青山捫蝨坐黃鳥挾書眠自謂不減杜詩以為得意然不能舉全篇余頃嘗以語薛肇明肇明時被旨編公集徧求之終莫之得或云公但得此一聯未嘗成章也

西清詩話仁廟嘉祐中開賞花釣魚宴介甫以知制誥預末坐帝出詩示羣臣次第屬和末至

介甫日將夕矣亟欲奏御得披香殿字未有對  
時鄭毅夫辦接席顧介甫曰宜對太液池故其  
詩有云披香殿上畱朱輦太液池邊送玉盃  
日都下盛傳王舍人竊柳詞太液波翻披香簾

卷介甫頗銜之

優古堂詩話韓退之喜雪獻裴尚書詩云喜深  
將策試驚密仰簷窺又云氣嚴當酒煖密聽  
窗知荆公全用一聯云借問火城將策試何如

雲屋聽窗知

雞肋編王介甫作韓魏公挽詩云木稼嘗因達

官怕山摧今見哲人萎時華山崩京師木冰極  
為中的人多不見木稼出處按舊唐書五行志  
開元二十九年十一月二十二日雨木冰凝寒  
凍冽而數日不解寧王見而歎曰諺云樹稼達  
官怕必有大臣當之其月王薨  
渢水燕談王荆公之時學者得出其門自以為

榮一被稱與往往名重天下公之治經尤尚解  
字末流務為新奇寔成穿鑿朝廷患之詔學者  
兼用舊傳注不專治新經禁援引字解于是學  
者皆變所學至有著書以詆公之學者又諱稱  
公門人故張芸叟為挽詞曰今日江湖從學者  
人人諱道是門生及後詔公配享神廟贈官賜  
諡俾學者復治新經用字解昔之學者稍稍復  
稱公門人有無名氏改芸叟卒章云人人卻道  
是門生  
高齋詩話荆公題金陵此君亭詩云誰憐直節  
生來瘦自許高才老更剛賓客每對公稱頌此  
句公輒顰蹙不樂晚年與平甫坐亭上觀詩牌  
曰少時作此題榜一傳不可追改大抵少年題  
詩可以為戒平甫曰此揚子雲悔其少作也  
教陶孫詩評王荆公如鄧艾綽兵入蜀要以險  
絕為功

團扇

玉斧修成寶月團月中仍有女乘鸞青冥風露非人世  
鬢亂釵橫特地寒

天厨禁脔云讀之令人一唱三歎譬如朱弦疏  
越有遺音者也

和女詩

青燈一點映窗紗好讀楞嚴莫憶家能了諸緣如幻夢  
世間唯有妙蓮花

冷齋夜話舒王女吳安持妻蓬萊縣君工詩多  
佳句有詩寄舒王王以楞嚴經新釋付之并和

云云

### 寒穴泉

神泉冽冰霜高穴與雲平空山渟千秋不出鳴咽聲山  
風吹更寒山月相與清北客不到此如何洗煩醒

墨莊漫錄華亭有寒穴泉與無錫惠山泉味相  
同荆公嘗有詩云

### 寄蔡氏女

建業東郭望城西堠千嶂承宇百泉遶雷青遙遙兮纚  
屬綠宛宛兮橫逗積李兮縞夜崇桃兮炫晝蘭馥兮衆

植竹媚兮常茂柳蒿綿兮含姿松偃蹇兮獻秀鳥跂兮  
下上魚躍兮左右顧我兮適我有斑兮伏獸感時物兮  
念汝遲汝歸兮攜幼

我營兮北渚有懷兮歸女石梁兮以苦蓋綠陰陰兮承  
宇仰有桂兮俯有蘭嗟女歸兮路豈難望超然之白雲  
臨清流而長嘆

朱文公楚詞後語云寄蔡氏女者王文公之所  
作也公以文章節行高一世而尤以道德經濟  
為己任被遇神宗致位宰相世方仰其有為庶  
幾復見二帝三王之盛而公乃汲汲以財利兵

革為先務引用凶邪排擯忠直躁迫強戾使天下之人囂然喪其樂生之心卒之羣姦嗣虐流毒四海至於崇宣之際而禍亂極矣公又以女妻蔡卞此其所予之詞也然其言平淡簡遠脩然有出塵之趣視其平生行事心術畧無毫髮肖似此夫子所以有于予改是之歎也歟

### 絕句

穰侯老擅關中事  
嘗恐諸侯客子來  
我亦暮年專一壑  
每聞車馬便驚猜

侯鯖錄元豐末有以王介甫罷相歸金陵後資用不足達裕陵睿聽者上即遣使以黃金二百兩就賜之介甫初喜意名已既知賜金不悅即不受舉送蔣山修寺為朝廷祈福此詩未能忘



情在丘壑者也

與外弟飲

一自君家把酒杯六年波浪與塵埃不知烏石岡頭路  
到老相尋得幾回

冷齋夜話山谷言詩意無窮而人才有限以有限之才追無窮之意雖淵明少陵不得工不易其意而造其語謂之換骨法規摹其意形容之謂之奪胎法如顧況詩曰一別二十年人堪幾回別其詞簡緩而意精確荆公與故人詩云云所謂奪胎法也

賞心亭

霸氣消磨不復存  
舊朝臺殿只空村  
孤城倚薄青天近  
細草侵尋白日昏  
稍覺野雲成晚霽  
却疑山月是朝暾  
此時江海無窮興  
醒客無言醉客喧

自金陵至丹陽道中有感

數百年來王氣消  
難將往事問漁樵  
苑方秦地皆蕪沒  
山借揚州更寂寥  
荒埭暗雞催月曉  
空場老雉挾春驕  
豪華只有諸陵在  
往往黃金出市朝

藝苑雌黃予與鄉人翁行可同舟沂汴因談及  
詩行可云介甫善下字如空場老雉挾春驕下

得挾字最好即孟子挾長挾貴之挾予謂介甫  
又有紫萸凌風怯蒼苔挾雨驕後山有寒氣挾  
霜侵敗絮賓鴻將子度微明其用挾字亦與前  
一聯同末言陵墓遭發金玉出於人間矣

初夏絕句

石梁茅屋有灣碕流水澌澌度兩陂晴日煖風生麥氣  
綠陰幽草勝花時

娛書堂詩話范石湖云嘗蒙恩獨引觴詠壽皇  
與行苑中親誦後句以為佳

試院中作

少年操筆坐中庭子墨文章頗自輕聖世選才終用賦

白頭來此試諸生

詳定官作

童子常誇作賦工暮年羞悔有揚雄當年賜帛倡優等  
今日論才將相中細甚客卿因筆墨卑於爾雅注魚蟲  
漢家故事真當改新詠知君勝弱翁

韻語陽秋荆公以詩賦決科而深不樂詩賦試  
院中五絕其一云云後作詳定官復有詩云云  
熙寧四年預政遂罷詩賦專以經義取士蓋平  
日之志也

歲晚

月映林塘靜風涵笑語涼俯窺憐淨淥小立佇幽香攜  
幼尋新萼扶衰上野航延緣久未已歲晚惜流光

漫叟詩話荆公定林後詩精深華妙非少作之比嘗作歲晚詩自比謝靈運識者以為然

示公佐

殘生傷性老耽書年少東來復起予各據槁梧同不寐  
偶然聞雨落堦除

壬辰寒食

客思似楊柳春風千萬條更傾寒食淚欲漲冶城潮中

鬢雪爭出鏡顏朱早凋未知軒冕樂但欲老漁樵

自白土村入北寺

雨過百泉出秋聲連衆山獨尋飛鳥外時度亂流閒坐  
石偶成歇看雲相與還會須營一畝長此聽潺潺

泊船瓜洲

京口瓜洲一水閒鍾山祇隔數重山春風又綠江南岸  
明月何時照我還

容齋續筆吳中士人家藏其草初云又到江南  
岸圈去到字注曰不好改為過復圈去而改為

人旋改為滿凡如是十許字始定為綠

送和甫寄女子

荒煙涼雨助人悲  
淚染衣襟不自知  
除卻春風沙際綠

一如送汝過江時

以上臨川集

釋普聞詩論拂去豪逸之氣屏蕩老健之節其意韻幽遠清癯雅麗為得也

寄池州夏太初

一水衣巾剪翠綃  
九華環珮刻青瑤  
生才故有山川氣  
卜築兼無市井蹕  
三葉素風門閥在  
十年塵跡履綦銷

歸榮早晚重攜手莫負幽人久見招

能改齊漫錄王荆公有唐律一首寄池州夏太初今集不載序云不到太初郎中兄所居遂已十年以詩攀寄

絕句

白馬津頭驛路邊陰森喬木帶漪漣斜陽一馬怱怱過  
夢寐如今十五年

能改齊漫錄荆公題一絕于夏旼扇今集不載

柳瑾



瑾字子玉慶歷二年進士

句

過盡金湯知帝策見求貂虎識君儀男兒本有四方志  
祇在蓬瀛自不知 王荆文公詩自注

陳洙

洙字師道建陽人慶歷二年進士歷殿中侍御  
史嘉祐中上疏助司馬光論建儲且飲藥而卒  
以明無所覲望奏下大計遂定仁宗聞洙死賜

錢百萬元祐初用光言官其一子

吳耿先生還北山舊居

蒼浪兩鬢斑盡意六經間有術佐明主無官歸故山釣

臺春水碧吟榭暮雲閒見說還家後重將舊史刪

前賢  
小集

拾遺

遊雲際寺

在邵武軍光澤縣

清曉捫蘿踏嶺雲寒風飛溜溼衣巾上攀霄漢無多地  
直視城闔幾點塵古木半陰藏宿霧山禽相語厭遊人

明年更補閩中吏來看桃花爛漫春

瀛奎律髓

靖安寺

五代時建寧詩人江為故宅

處士亡來二百年故居牢落變祇園詩名長共江山在  
冤氣尚磨星斗昏臺榭幾人畱好句漁樵何處問曾孫  
昔時泉石生涯地日暮寒雲遶寺門

建寧府志

毛維瞻

維瞻開封人居三衢慶厯二年進士累遷參知  
政事

筠州山房

樓上青山繞四陲畫樓百步引朱扉落成當與公同上

一看長江白練飛

江西通志

王珪

珪字禹玉華陽人徙舒瑱之從弟慶厯二年進  
士官翰林學士知開封府兼侍讀學士神宗朝  
拜尚書左僕射門下侍郎哲宗即位封岐國公  
卒贈太師諡曰文有華陽集

王文正公日錄神廟時每夕有赤氣見西北隅如火至人定後乃滅人以爲皇子生之祥故禹玉作大燕樂詞云未曉清風生殿閣經旬赤氣照乾坤未幾皇子生大燕羣臣于集英殿

文潞公丞相出鎮西京奉詔於瓊林苑燕餞從列

皆賦詩送行

都門秋色滿旌旗祖帳容陪醉御卮功業特高嘉祐末精神如破貝州時匣中寶劍騰霜鏑海上仙桃壓露枝昨日更聞褒詔下別刊名姓入周藝

墨莊漫錄

東臯筆錄嘉祐中文潞公彥博富鄭公弼爲相劉沆王堯臣爲參政始議立皇嗣而事祕不傳

雖英宗亦莫知也元豐中王公之子同光上書  
言先帝之立乃先臣在政府始議也其始終事  
並藏臣家乃宣取上驚歎久之是時富劉王三  
公皆已薨獨潞公畱守西京遽召至闕慰藉恩  
禮隆厚冊拜太尉及還西都上作詩送行有報  
在不言功之句兩府並出餞皆有詩王禹玉詩  
云功業特高嘉祐末精神如破貝州時蓋謂是  
也

### 上元應制

雪消華月滿仙臺萬燭當樓寶扇開雙鳳雲中扶輦下  
六鼇海上駕山來鎬京春酒霑周燕汾水秋風陋漢才  
一曲昇平人共樂君王又進紫霞杯

韻語陽秋元豐中令從臣和元夕觀燈詩蔡持  
正密叩王公云應制上元詩如何使事禹玉曰  
鼇山鳳輦外不可使章子厚面笑之十七日登  
對神宗獨賞禹玉詩妙於使事

史院席上和首相吳公原韻

曉下金門路君筵聽召餘簪纓三壽客筆削兩朝書身

老雖逢此恩深盡醉歟傳聞訪餘事應走使臣車

揮塵後錄

在翰苑作

晨光未動曉驂催又向壇頭飲社杯自笑治聾終不是

明年強健更重來

懶真子錄

和梅公儀琴高魚

三月江南花亂開青溪曲曲水如苔琴高一去無蹤迹

枉是漁人尚見猜

賓退錄

溫成皇后閣立春帖子

曰璠按曲洧舊聞作歐公詩

昔聞海上有仙山煙鎖樓臺日月閒花下玉容長不老

只應春色勝人間

隱居詩話溫成皇后初薨會立春進帖子是時歐陽修王珪同在翰苑以其虛閣故不進俄有旨令進王珪遽口占一首歐陽歎其美麗



端午帖子

紫閣瞳矐隱曉霞瑤墀九御薦菖華何人又進江心鑑

試與君王卻衆邪

容齋五筆

夫人閣端午帖子

後苑尋青趁午前歸來競鬪玉闌邊袖中獨有香芸草

畱與君王辟蠹編

後村詩話

挽老蘇先生

岷峨地僻少人行一日西來譽滿京白首只知聞道勝

青衫不及到家榮  
玄猿夜哭銘旌過  
紫燕朝飛挽鐸迎  
天祿校書多分薄  
子雲那得葬鄉城

蘇集附錄

### 大饗明堂慶成

皇祐更秋律  
明堂奉帝禋  
粢盛雖薦德  
霜露本懷親  
於赫朝三后  
無文秩百神  
九筵交玉幣  
重屋近星辰  
遽幄畱颺御  
清壇墮月津  
衣冠漢儀舊  
金石舜韶新  
受胙開宣室  
鳴鐘降紫宸  
羣陰光復旦  
叶氣斗回春  
靈貺叢千祝  
豐恩滲四垠  
慙非老辭筆  
徒學煥堯文

瀛奎律髓禹王為詞臣則摘藻細潤典雅勁健  
未有後來全句長句之病時號為至寶丹以多  
用金玉珠璣錦繡之類然亦有不全然者此詩  
豈不謂之細潤典雅

再登賞心亭

六朝遺迹此空存城壓滄波到海門  
萬里江山來醉眼  
九秋天地入吟魂於今玉樹悲歌起  
當日黃旗王氣昏  
人事不同風物在悵然猶得對芳樽  
詩林萬選

宮詞

花裏宮鶯曉未啼千牛仗下報班齊  
銀袍五百趨龍尾

天子臨軒賜御題

侍輦歸來步玉階  
試穿金縷鳳頭鞋  
堦前摘得宜男草  
笑插黃金十二釵

內苑官人學打球  
青絲飛控紫驂驪  
朝朝結束防宣喚  
一樣真珠絡轡頭

黃昏鎖院聽宣除  
翰長平明趁起居  
撰就白麻先進草  
金泥降出內中書

紗幔薄垂金麥穗  
簾鉤纖挂玉蔥條  
樓西別起長春殿

香壁紅泥透蜀椒

內人稀見水鞦韆爭擘珠簾帳殿前第一錦標誰奪得  
右軍輸卻小龍船

盤龍新織翠雲裘  
點黃封玉匣收防備  
秋來供御著  
金箱捧入曝衣樓

盡日間窗賭選仙  
小娃爭覓倒盆錢  
上籌爭占蓬萊島  
一擲乘鸞出洞天

十家官詞

呈永叔書事

嘉祐二年禮部倡和

誥書初捧下西箱重棘連催暮鑰忙綠繡珥貂畱帝詔

元注元夕有綠衣中使傳宣

紫衣鋪案拜宸香卷如驟雨收聲急

筆似飛泉落勢長十五年前出門下最榮今日預東

堂

歐陽修歸田錄嘉祐二年余與端明韓子華翰  
長王禹玉侍讀范景仁龍圖梅公儀同知禮部  
貢舉辟梅聖俞為小試官凡鎖院五十日六人  
者相與倡和為古律歌詩一百七十餘篇為三  
卷禹玉余為校理時武成王廟所解進士也至  
此新入翰林與余同院又同知貢舉故禹玉贈  
余云十五年前出門下最榮今日預東堂余答  
云昔時叨入武成官曾看揮毫氣吐虹夢寐閒

思十年事笑談今日一尊同喜君新賜黃金帶  
顧我今為白髮翁

依韻恭和聖製龍圖天章閣觀三聖御書

半夜傳君召西清閣帝文筆迴丹穴鳳歌起沛鄉雲御  
幄金蚪轉仙墀羽仗分君王自天縱況復睿心勤以上曹氏  
歷代詩選

句

披褐曾陳定羌策汗青猶著立儲書春風澤國吟箋落  
夜雨溪堂宴豆疎

許彥周詩話外祖父邵安簡公布衣時上平元  
昊策又嘗勸仁廟早立太子晚年自樞府出知  
越州又移鄆州其亮也岐公作挽詞云云不獨  
語句精練且是著題

金縷黃龍扇蘭芽翠釜湯

夫人閣端午帖子

繞臂雙條達

紅紗畫夢驚

同上

震邸陪經席辰階總化鈞

晏元獻挽詩

未染

仙人杏先柔帝女桑

皇后閣帖子

靈宮千福墮清廟一誠專

南郊舊蠹繡書櫝羣訛正說鈴

校理東觀

曉日破紅浮鬪棋

夕雲凝紫護周垣

祠太乙宮

官職聲名君自有何妨更絕

郢中吟

和石昌言雪

灼灼海棠誰復折差差燕子又還飛

以上



海錄碎事

舞急錦腰迎十八酒酣玉璫照東西

墨莊漫錄樂府六么曲有花十八古有玉東西  
杯對甚新

石象之

象之字簡夫新昌人慶歷二年進士官太常丞

詠愁

來何容易去何遲半在心頭半在眉門掩落花春去後  
窗涵殘月酒醒時柔如萬頃連天草亂似千尋市地絲

除却五侯歌舞地人閒何處不相隨

新昌縣志

石聲之

聲之新昌人

遊南明山

祇應尋勝到林泉四抱危峯萬朶蓮僧過不知山隱寺  
客來方見洞開天浮圖照水光相映古木依崖影倒懸  
風露了非人世界濯纓秋後玉壺仙

越咏

黃庶

向宗道

庶字亞夫分寧人慶厯二年進士歷州郡從事攝康州有伐檀集山谷其子也

宿趙屯

蘆花一股水弭棹日已暮山閒聞雞犬無人見煙樹行  
逐羊豕跡始識入市路菱芡與魚蟹居人足來去漁家  
無鄉縣滿船載稚乳鞭笞公私急醉眠聽秋雨

怪石

山鬼水怪著薜荔天祿辟邪眠莓苔鉤簾坐對心語口

曾見漢唐池館來

斑石枕聯句同向宗道

斲得西山骨磨礱露斑駁凝結一何怪

宗道形模萬難學

直疑彩雲根

庶

又訝紫珉礪中瘦皴蛟腹

宗道

外文灼龜

殼冷剖清泉肝

庶

穗楮老黿腳堅方君子性

宗道

清純聖

人璞有氣當補天

庶

無瑕應並鼓定漬盤古苔

宗道

想漏

神農藥堪作夢寐寶

庶

尤是炎蒸託眠月病頭愈

宗道

橫

風醒肺濯珊瑚侈可唾

庶

陶甄脆堪撲夜深魘鬼驚

宗道

晝冷詩魔愕首愜無俗夢庶心清去煩惡蘄簞方敢友

宗道蜀筇良可攬何必檄愈風庶何必文驅瘡質任兒女

咄宗道頑宜童僕詭枕流固迂誕庶藉糟徒落魄潤生審

將雨宗道輝發宜有珥髑髏莊生狂庶虎魄宋武薄欲鏡

中郎銘文章體猶弱欲祕淮南書神仙志可樂宗道我疑

混沌鑛誰與礪竅鑿可作甘寢輿華胥詣冥冥庶子道

足施為我拙困嬰縛已謀具巾屨行當老嵩霍子其乞

我歸終焉臥雲壑宗道嗜好我已癖須求子惟慙羶舊王

固惜瓢陋顏不博異時一經子便當千金橐客退獨摩

拂臥送山月落

庶

以上伐檀集

韓欽聖

欽聖慶歷二年進士

句

迎鋒畫幡轉交鏃采文繁

省試黜門賜戟

古今詩話

句龍緯

緯蜀人慶歷進士太學博士

題惠泉寄知軍郎中

在荆門

崎嶇荆門山叢起為東阨陽岡盤氣勢陰竇融液脈源  
濯雲根移流噴石罅折呀呀兩岸閒平澗繞數席環岝  
貯清泚古鏡照秋色恬風不生紋至底無隱物澄輝泛  
嵐翠淨影溶天碧潛花深回回陰樹高岑岑清光照毛  
髮爽氣灑肌骨如入冰壺中亭宇何鮮飾綰罍日往來  
舉汲易為力短綆何勞人輕舫恰容客客當時竟陵翁老  
死卻不歷品第十九泉遺此良可惜此泉惠此土唯日

流不息作詩頌惠泉勉哉君子德

荊州府志

賈宗諒


宗諒官內園洛苑如京崇儀使

上元日駕幸太乙宮燒香

金鑾晨動暖風微  
比屋歡呼望帝暉  
天喜宴開新福館  
雲深香滿侍臣衣  
九韶鳳舞當雙闕  
萬燭龍趨護六飛  
為與吾民同樂事  
月輪猶未下端闈

古今歲時雜詠





宋詩紀事卷十五

# 欽定四庫全書

集部

宋詩紀事卷十六

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣朱烱

謄錄監生臣李學瞻

欽定四庫全書

宋詩紀事卷十六

錢塘厲鶚撰

蘇 軾

宋字公佐磁州滏陽人舉進士神宗朝累官給事中知河南府

和趙閱道游海雲山

笙歌揭虛閣帷幕市春池且與民同樂都忘天一涯舊  
遊嗟倏忽故步喜追隨陌上人如堵歸鞍莫載馳

成都文類

呂夏卿

夏卿字縉叔晉江人慶歷二年進士調江寧尉  
用薦為編修唐書官書成遷直祕閣同知禮院  
熙寧初遷兵部員外郎知制誥出知潁州卒

泉州府志初歐宋二公典領唐史十七年書始  
成凡預載筆者皆一時高選前後十餘人遷徙  
不常唯夏卿與范鎮自發凡訖于絕筆夏卿又  
纂新書紀志傳義例摘二公繁文闕誤目為唐  
書直筆新例一卷唐兵志三卷又集天下碑刻  
為唐文獻考歷代氏族譜志為古今世系表

春陰

海棠陰淺日黃昏  
畫閣輕寒繡被溫  
春夢醒來能記否  
賣花聲過忽開門

後村千家詩

陳襄

襄字述古  
候官人  
慶歷二年進士  
歷官知制誥  
直學士院  
知陳州  
徙杭州  
以樞密直學士知通  
進銀臺司  
兼侍讀判尚書都省  
卒贈給事中有

古靈集

送關都官致仕

鴻雁于飛送關公也公能以禮致仕惜其有老成德不衰不養于朝天子不用古禮畱之故作是詩也

鴻雁于飛歸戾于澤君子于田亦適維則旅力不愆曷云其極庶民之耄職自為愚君子之耄其德有濡旅力不愆曷云其劬有堅松柏君子斧之有實秬稷農夫有之天子有老曷其與歸野有白駒來食我藁君子之往胡為不畱我心悠悠為天子之憂

幽齋

幽境絕塵蹤莓苔上粉墉秋聲連夜雨寒色一溪松學  
有書千卷歡無酒萬鍾雲屏孤夢斷寂寞掩巫峯

和子瞻沿牒京口憶西湖出遊見寄

春陰漠漠燕飛飛可惜春風與子違半嶺烟霞紅旆入  
滿湖風月畫船歸絳笙一闋人何在遼鶴重來事已非  
猶憶去年離別處烏啼花落客霑衣

寄遠

飛鵲翩翩暮欲棲楚天新月射璇題袖中已減三年字

心曲惟通一點犀  
步障影迷金谷路  
桃花香隔武陵溪  
瑤華好折無人寄  
腸斷江樓百尺梯

夜意

熏爐香燼蕙烟沈  
凜冽寒生翡翠衾  
月國音塵千里絕  
仙山樓閣五雲深  
離懷暗耿金壺漏  
獨夢多驚玉女碁  
騎省中郎才調逸  
擬將文筆賦秋心

使還咸熙館道中作

土曠人稀使驛賒  
山中殊不類中華  
白沙有路鴛鴦泊



芳草無情妯娌花  
氈館夜燈眠漢節  
石梁秋吹動胡笳  
歸來覽照看顏色  
斗覺霜毛兩鬢加

韋羌山

在天台山西上有石壁字如科斗

去年曾覽韋羌圖  
云有仙人古篆書  
千尺石巖無路到  
不知科斗是何書

中和堂木芙蓉盛開戲贈子瞻

千林寒葉正疎黃  
占得珍叢第一芳  
容易便開三百朶  
此心應不畏秋霜

題寶嚴院垂雲亭

在杭州七寶山

小亭巉絕出雲間，萬象升沈不得閒。  
莫怪詩翁頭白早，時來向北寫湖山。

以上古靈先生集

連庠

庠字元禮，應山人。慶歷二年進士，為宜城令。至都官郎中。

宋史隱逸傳：連庶字君錫，舉進士，監陳州稅，罷歸。始與弟庠在鄉里，時宋郊兄弟歐陽修皆依之。及二宋貴達，不可其志，退居二十年，守道好修，非其義秋毫不可污也。庠亦登科，敏于政事，號良吏。

終都官郎中

襄州守王侯洙復峴山羊公祠

大江西來遶重城猶如叢花足練縈左山右阜若開避  
曾是峴首當頭橫江湍衝山山不動滔滔雪浪東南傾  
隤然巨勢壓漢境萬楚不得專雄名四時美景千百狀  
登臨可以攄襟靈近麓按藍秋水綠幽巖團纈春葩明  
寒林蕭疎四面合夏木延袤長川青危巔碑墊龜螭墊  
陰崖檜老蛟龍形俯瞰洲島相向背風恬江面羅紋生

漁舫數百集其下瞥然來往一葉輕波底崢嶸沈翠影  
搓頭鳬雁斂霜翎天然佳致信可尚直是丹青寫不成  
叔子當年樂山水每來置酒空壚罌賢達勝士共愛此  
謂此風景魁南荆荆人被化思不已立祠山椒共祭牲  
爾來綿亘幾千載瓦飛棟撓誰經營守臣罕肯著腳到  
遂至完固屬兼并非憚鳩工繕完葺誠知仁政難繼聲  
帝眷襄陽曰重鎮宜從館閣擇名卿明公之來百城悅  
壺漿竹馬相歡迎政成公休屢登覽山前車騎長晶熒

僚空寓目看不足詩豪佚發輸精誠乃敕寮屬復祠宇  
仍從嶺上新虛亭歲時遊憩備言詠荆人愛之猶鉅平  
羊公之政公之化異時一致當同評兩賢繼美何以況  
山之永兮水之清

襄陽府志

### 李觀

觀字夢符自號玉谿叟素州人慶厯二年試南  
宮賦偶落韻有司愛其策為取特旨由是登第  
以著作佐郎知臨江軍清江縣嘗為太學官出

判處州

宜春傳信錄朝議大夫李觀夢符史傳諸書過目成誦文章如元次山登第歷官知處州不就請監南嶽廟以歸建玉溪洞中有抱一堂水仙亭有梅所曰香雪塢有衆花處曰錦繡塢貯書史處曰文藪終日醉吟溪上於世味淡如也

題處州直廳壁

十謁朱門九不開  
利名淵藪且徘徊  
自知不是公侯骨

夜夜江山入夢來

能改齋漫錄

許當

當字當時慶厯初為古田令

桃溪

桃溪一何清想像武陵水所愛春風時灼灼花數里漁艇日來去無人識歸止安知歷幽源不遇神仙子

福州府志

石蒼舒

蒼舒字才叔雍人善行草官承事郎通判保安

庫

別韓魏公

闕七字

簾前二聖擁千官唯有埽門霜鬢客卻隨社

燕入長安

過庭錄石蒼舒與韓魏公有舊韓拜相石至干祿留數月無成石作詩以別歸韓覽之惻然遂注一官而去

胡恢

恢金陵人華州推官

句

建業江山千里遠長安風雪一家寒



夢溪筆談金陵胡恢善篆隸坐法失官困于京師上韓魏公詩魏公深憐之令篆太學石經得復官任華州推官而卒

## 姚嗣宗

嗣宗關中人韓魏公薦試大理評事

續湘山野錄嗣宗關中詩豪忽繩檢坦然自任杜祁公帥長安多裁品人物謂尹師魯曰姚生如何人尹曰嗣宗者使白衣入翰林亦不忝減死一等黥流海島亦不屈姚聞之大喜曰所謂善評我者也

## 書驛壁

南越干戈未息肩  
五原金鼓又轟天  
崆峒山叟笑無語  
飽聽松風春晝眠

續湘山野錄元昊以河西叛朝廷方羈籠關中  
豪傑之際嗣宗因題詩二於壁其五言有蹋碎  
賀蘭石埽清西海塵布衣能效死可惜作窮鱗  
之句韓忠獻公竒之奏補職官既而一庸生張  
某亦堂堂人蜩髯黑面頂青巾緇裘持一詩代  
刺搖袖以謁杜公有長安有客面如鐵為報君  
王早築臺之句杜和公亦異之奏補乾祐一尉  
而胸中無一物未幾以贓去任

俞汝尚

汝尚字仁廓號退翁又號溪堂居士歸安人慶

歷二年進士王安石當國欲寘汝尚御史驛召  
詣京力辭得免從趙抃於青州以屯田郎中致  
仕卒

贈張伯玉倅古睦

新定烟霞外溪山清可依夜風泉溜響春雨藥苗肥野  
鶴眠花圃晴嵐溼案衣預知公暇日垂釣子陵磯

詩林萬選

題三角亭

奇哉山中人構此亭上宇蔥徑斜映帶林烟盡吞吐春

無四面花夜欠一簷雨寄傲足有餘何須存廣廡

前賢小集

拾遺

久客

久客西城裏人家似舊鄰衆知趨事嬾僧厭打門頻倦  
枕費窗燭閒書破硯塵陰晴消白日門巷忽青春

瀛奎律髓

賈黯

黯字直孺南陽人慶厯六年進士第一嘉祐中  
累擢翰林學士英宗朝遷給事中權御史中丞

以疾乞郡除翰林侍讀學士知陳州卒贈禮部

侍郎

襄州守王侯洙復峴山羊公祠

古郡襄水陽羣山繞郭郭其閒峴首者羊公最所樂登  
臨見洲渚氣象真磅礴公乎既已沒高碑此鏡鑿廟食  
有遺像當時盛丹雘到今僅千載碑廟皆頽落喬木荒  
榛閒廟址存依約碑倒石屢易文字免缺錯我侯至之  
初亭廟皆新作為詩道其意風化思所託侯慕羊公心

仁政及物博將見襄陽治與古相侔若

襄陽府志

李康伯

襄州太守王侯洙復峴山羊公祠

賢哉西晉鉅平侯刻碑立祠在荊州州民萬家見之者  
揜面汎瀾雙淚流逮今縣歷幾百祀峴首巍然臨漢水  
碑鉞廢祠榛莽中蕭蕭只有悲風起內閣深沈侍從臣  
赤帷阜蓋來行春殷勤拂碑復祠貌一朝舊迹重如新  
山光蔥蒨水清冽天長地久無時別古人今人空茫茫

惟是功名不能滅

襄陽府志

張去惑

襄州太守王侯洙復峴山羊公祠

漢江千里清溶溶惟此南夏奠其中因山為城峙險固  
一國形勝何高雄巍然巨首名曰峴回壓面勢尊且崇  
東扼迅流疑引翼西峙羣阜如盤龍嶽巖峻拔不可擬  
絕岸萬丈凌長空下闕澄潭迴無際旁睨比屋幾可封  
天意造物豈虛設控蠻鎮楚舒隆隆自昔登憩且非一

此山振動惟羊公有志平吳運祕略竭心衛晉推元功  
綏懷遠邇人所服開墾田疇時以豐慨然置酒適清曠  
中郎幕府賢而通語公令望高四海當與斯山永無窮  
自是綿綿歲歷久閱碑墮淚存遺蹤亭祠浸壞詎可究  
山歸民籍木以童前知興衰故有日覽者歎息追無從  
龍圖王公守茲土修舉廢墜詰初終感物思人但長息  
剡章疾置聞四聰聖宸動色可其請茲山復興氣象融  
眈眈大廈揭亭宇肅肅真像嚴祠宮遂使靈光享血食



禁樵復祀資格恭大抵有功及民物盛德期與天地克  
今之視古皆一致休哉千載懷清風

襄陽府志

### 王介

介字中父衢州人以制舉登第性聰悟絕人所  
嘗讀書皆成誦而任氣多忤物以故不達終于

### 館職

### 送張君宰吳江

乍被軒綏寵新辭計省繁三江吳故國百里漢郎官烟

水蓴芽紫霜天橘顆丹優游民政外風月即清歡

明道雜志

句

命也豈終否時乎不暫留勉哉藏素業以待歲之秋

贈人

下第

明道雜志中父作詩多用助語作句如贈人落第詩云云此格古未有也

草廬三顧動幽蟄蕙帳一空生曉寒

石林詩話中甫與王荆公游甚款未嘗降意相下熙寧初荆公以翰林學士被召前此屢召不起至是始受命介以詩寄公云云盖有所諷公得之大笑他日作詩有丈夫出處非無意猿鶴

從來自不知之句蓋為介發也

## 劉敞

敞字原父臨江新喻人慶歷六年進士第二累遷知制誥拜翰林學士改集賢院學士判南京御史臺卒門人私謚曰公是先生有集

郡齋讀書志原父出知永興感官妓得驚眩疾力求便郡仁宗謂執政曰如敞者豈易得耶賜以新橙五十  
劉政暇日記劉原父晚年病不復識字日月兒女皆不能認人言永興中多發冢墓求古物致此

瓊花

并序

自淮南遷東平移后土廟瓊花植于濯纓亭此花天下只一株耳永叔為揚州作無雙亭以賞之彼土人別號八仙花或云李衛公所賦玉蘂即此種

淮海無雙玉蘂花異時來自八仙家魯人未覩天中樹乞與春風賞物華

鐵漿館

以下二首奉使作

稍出盧龍塞回看萬壑青曠原開磧口別道入松亭

此館

以南屬奚山溪深險以北屬契丹稍平衍漸近磧矣別  
一道自松亭關入幽州甚徑易敵常祕不欲漢使知  
代馬寒隨草奚車夕戴星忽悲田子泰寂寞向千齡  
人以車帳為生晝夜移徙

檀州 正月二日

窮谷迴看盡孤城平望遙  
自古北口山至此都盡 市聲衙日集

此州衙日市集 海益午時消  
每旦海氣如霧至晚消盡土人謂之海益 冠帶才通

漢山川更入遼春風解冰雪最覺馬蹄驕

春草

春草綿綿不可名  
水邊原上亂抽莖  
似嫌車馬繁華處  
纔入城門便不生

飲子華家醉翁不來  
令藥仙彈醉思仙

翠睂紅袖拜尊前  
撩亂春聲入四弦  
坐少車公還不樂  
為君重奏醉思仙

以上公是先生集

李士衡硯

劉涇州所得

李侯寶硯劉侯得上有刺史  
李元刻云是天寶八年冬  
端州東溪靈卵石我語二客  
此不然天寶稱載不稱年

刺史為守州為郡此獨云爾奚所傳兩君盧胡為絕倒  
嗟爾於人幾何寶萬事售偽必眩真此固區區無足道  
硯箋

觀永叔五代史

大意晚有屬先生拔書彙是非原正始簡古斥辭費褻  
善傷獲麟疾邪記有蜚處心必至公撥亂豈多諱何必  
藏名山端如避羅爵

合璧事類後集

聞鶯

醉裏春空盡江邊客未歸可憐鳴睂睨似欲訴芳菲  
珍樹移時語殘花入眼稀離居亦幽獨求友莫相違

鴨腳

鶚按此首又見梅堯臣集

魏帝昧遠圖於吳求鴨腳乃為吳人料重玩志已愜江  
南有佳木修聳入天插葉如闌邊跡子剥杏中甲持之  
奉漢宮百果不相壓

養雞

茅茨一畝宮生理備委曲雞豚自古昔養養隨世俗鑿



垣安其棲幼長何碌碌旦出四散飛暮還相投宿頗哀  
鴻鵠輩飲啄不充腹何事萬里遊羈旅傷局促衣冠相  
嫵媚庭廡更追逐未悟糞土非豈知稻粱辱物理常有  
此人情苦不足安見避世翁頽然臥空谷

以上合壁事  
類別集

### 贈李才元

待詔先生窮巷居簞瓢屢空方晏如自探井臼秣羸馬  
卻整衣冠迎賜書王人駐車久歎息天子聞之動顏色  
飽死曾不及侏儒牧民會肯舒筋力詔書朝出蓬萊宮

繡衣還鄉由上衷君今已作二千石亦將復為第五公

徐度却埽編李才元大臨仕仁宗朝為館職家  
貧甚僮僕不具多躬執賤役一日自秣馬會例  
賜御書使者及門適見之歎息而去歸以白上  
上大驚異遂命知廣安軍熙寧中知制誥坐封  
還李定除御史詞頭與宋次道蘇子容俱得罪  
于是名重

桃花

小樓西望那人家出屋香梢幾樹花只恐東風能作惡

亂紅如雨墮窗紗

全芳備祖

夏夜

涼風響高樹清露墜明河雖復夏夜短已覺秋氣多豔  
膚麗華燭皓齒揚清歌臨觴不作意奈此粲者何

避暑錄話此詩當是在長安時作

### 雜詩效玉川體

毀巢鳳不至竭澤龍不游賢者有所歸得非龍鳳儔周  
公下白屋聖德被九州趙禹謝賓客漢朝以為優澆淳  
不相襲用舍何其繆苟徇一身利不為萬姓謀哀彼扶  
杜詩死生遺道周

宋藝圃集

劉敞

敞字貢父與兄敞同舉慶歷六年進士歷祕書少監出知蔡州召拜中書舍人卒弟子私謚曰公非先生有集

上書行

仕不至二千石賈不至五百萬此事夸者憂而非志士歎君不見下邳受書起幄中運籌制千里功成不受二萬戶拂衣歸從赤松子君不見計倪半策誅強吳鳴夷

扁舟泛五湖三致千金不自擅至今籍籍宗陶朱大賢  
富貴不為己心事邈與常人殊逢時致身如反手雲蒸  
龍變無時無君勿愛上書獻賦稱賢豪刺繡倚市相矜  
高丈夫昔曾笑徒勞商賈旦旦稱錐刀

自校書郎出倅秦州作

壁門金闕倚天開五見宮花落井槐明日扁舟滄海去  
卻將雲氣望蓬萊

長蘆寺

越舶吳商倚萬橈  
紺園金刹起中宵  
魚龍聽法多因雨  
江海歸心每上潮  
林黑夜深燈影白  
川平天濶梵聲遥  
心知水怪俱調伏  
惜取靈犀不用燒

送裴二知蘇州

著書元尚白  
送客鬼揶揄  
積水望江海  
秋風吹舳艫  
貴人千騎長  
紫綬左魚符  
道愛明南國  
歡聲接舊吳  
曉霜繁橘柚  
過雨熟菰蒲  
安得如吾子  
從君飛赤鳬

賦歐公廳前兩白鶴

明公真愛鶴愛鶴選仙骨遂令千里姿為君軒墀物啄  
腥豈復辭雞羣鍛翼欲比鳬鷺馴聆音發舞似矜客避  
寒孤警將依人歐公云此禽畏寒每舍屋中吾聞芝田逸翮不如此  
世上悠悠誰識真

詠史

自古邊功緣底事多因嬖倖欲封侯不如直與黃金印  
惜取沙場萬髑髏

齊東野語貢父此詩蓋指當時王韶李憲輩耳

絕句

青苔滿地初晴後  
綠樹無人晝夢餘  
惟有南風舊相識

徑開門戶又翻書

以上公非先生集

別茶嬌

畫堂銀燭徹宵明  
白玉佳人唱渭城  
唱盡一杯須起舞

關河風月不勝情

過庭錄長安妓有茶嬌者以色慧稱貢父感之  
被召造朝茶嬌遠送貢父作詩別之至關永叔  
去城四十五里迓貢父適病酒未起永叔日非  
獨酒能病人茶亦能病人矣



襄州淳于髡墓

微言動相國大笑絕冠纓流轉有餘智滑稽全姓名師  
儒空稷下衡蓋盡南荆贅壻不為辱旅墳知客卿

石林詩話貢父天資滑稽遇可譚諧雖公卿不  
避與王荆公素厚荆公當國亦屢譴之雖每為  
絕倒然意終不能平也元祐初知襄州淳于墓  
在焉題詩云云蓋以自解也

寄韓玉汝

嫖姚不復顧家為誰謂東山久不歸  
卷耳幸容攜婉孌  
皇華何處有光輝

石林詩話元豐初契丹來議地界韓丞相王汝出分畫將行與愛妾劉氏劇飲通夕且作詞留別翌日忽中批步軍司遣兵為搬家追送之初莫測所由久之方知自樂府發也貢父王汝姻黨即作小詩寄之以戲云

黛陀石硯

一片蒼山石遙憐巧匠心能存辟雍法宛是馬蹄金氣奪秋雲溼光涵墨海深魚龍隨醉筆變化出幽泮

硯箋

句

瀉湯奪得茶三昧覓句還窺詩一斑

優古堂詩話錢唐南屏謙師妙于茶事東坡贈之詩云道人曉出南屏山來試點茶三昧手劉貢父亦贈詩云

### 裴煜

煜字如晦慶厯六年省元治平中以開封府提刑知蘇州入判三司都磨勘司

### 多景樓

登臨每憶衛公詩多景唯於此處宜海岸千艘浮若芥邦人萬室布如棊江山氣象回環見宇宙端倪指點知

禪老莫辭勤迓候使君官滿有歸期

墨莊漫錄多景樓在北固山甘露寺中李贊皇題臨江亭詩有多景懸窗牖之句以是命名樓即臨江亭故基裴煜守潤日賦詩

錢 顗

顗字安道無錫人慶歷六年進士熙寧初為御史裏行以論奏王安石貶監衢州稅

遊爛柯山

春郊雜遯擁紅旌共訪仙蹤嘯傲行雲徑直從深崦入

石梁宛在半空橫巖邊瑤圃新開出洞裏芝田舊種成  
羽客一枰無復見青山畱得爛柯名

爛柯山洞志

劉 彝

彝字執中福州人少從胡瑗學中慶歷六年進士初為朐山令熙寧二年召對除兩浙運判移知虔州加直史館知桂林除名編隸涪州召還卒有居陽集

夜宿善權寺追懷陳述古

精識世所稀及道古稀有伊人雖云亡遺德不可朽嘗  
厭石渠游是邦爰出守浚河納湖波股派活畎畝學宮  
起城隅塗人或薪樵既富而教之薄俗適忠厚矧予平  
生時昏弱賴磨揉共擷姬孔微肯出臯稷後醇源浩罔  
涯實行靡容苟猶其老巖阿寂寞待同叩天乎奪大成  
旅茲宜興阜我來薤荆榛雨淚滴杯酒慟哭起秋風落  
葉紛林藪永懷三益恩語報乏瓊玖願子生人閒世  
為親友

周必大歸廬陵日記

悼賢詩

良田十頃接晴烟曾假過侯救旱年俸麥一車開德濟  
流民千里荷生全人嗟逝水今亡已俗感遺風尚泫然  
獨對老僧談舊事斜陽春色漫盈川

嵯縣志前刺史令過昱字彥勇皇祐三年以祕書  
郎來知剡事連值歲祲出常平錢糶米以活流  
民復割俸麥七十斛為種假趙化院十餘頃役  
饑民耕種之明年得麥五百餘斛民賴以活熙  
寧中昱已亡葬過故院與僧追誦歎歔見民有  
談及公去無不泣下因此作詩題之院壁

胡楚材

楚材睦州壽昌人慶歷六年進士

憶彭頭山

久客倦行役故山安在哉松竹讀書室水石釣魚臺  
月照歸夢西風吹酒杯亭亭籬下菊寂寞為誰開

嚴州府志

楊蟠

蟠字公濟章安人

一作錢唐人

慶歷六年進士為密

和二州推官以詩知名元祐中蘇軾知杭州蟠  
為通判與軾倡酬為多後知溫壽二州卒有集



陪潤州裴如晦學士遊金山回作

世上蓬萊第幾洲，長雲漠漠鳥飛愁。  
海山亂點當軒出，江水中分繞檻流。  
天遠樓臺橫北固，夜深燈火見揚州。  
迴船卻望金陵月，獨倚牙旗坐上頭。

宋文鑑

蓴菜

休說江東日日寒，到來且覓鑑湖船。  
鶴生嫩頂浮新紫，龍脫香髯帶舊涎。  
玉割鱸魚迎刃滑，香炊稻飯落匙圓。  
歸期不待秋風起，漉酒調羹似去年。

茗溪漁隱叢話

東岡隋真觀法師塔

東岡人不識野寺在樵漁落葉年年滿春風為掃除

楊梅塢

夏日紅相照天晴塢自開襄陽多稚子摘贈故人來

西溪

為愛西溪好長憂溪水窮山源春更落散入野田中

錢唐江上

一氣連江色寥寥萬古清客心兼浪湧時事與潮生路

轉青山出沙空白鳥行幾年滄海夢吟罷獨含情

以上咸淳

臨安志

### 去郡後作

為官一十政宦遊五十秋平生憶何處最憶是溫州思  
遠城南曲西岑古渡頭綠觴春送酒紅燭夜行舟不敢  
言遺愛唯應念舊遊憑君將此曲寫寄謝公樓

溫州府志

### 時燕堂

在高郵州治東衆樂園蟠為守時建

吏隱孟城九十旬豐年日是佳辰賦成席上猶飛雪

歌動梁間已落塵此地誰為愛酒伴他時儻憶種花人  
五壇芍藥齊教放何處揚州更覓春

高郵州志

練光亭

寒光萬頃澹高秋粉壁朱闌佇客愁  
晚日蕭蕭聞落葉晴天歷歷數飛鷗  
烟橫絕島疎難掩月在平波瑩不流  
懷抱未忘知有處且和風笛醉滄洲

丹陽縣志

孫永

永字曼叔趙人舉進士官吏部尚書謚康簡

清明

每年每遇清明節把酒尋花特地忙今日江頭衰病起

佛前新火一爐香

古今歲時雜詠

袁陟

陟字世弼號遜翁南昌人慶歷六年進士知當

塗縣官止太常博士卒有遜翁集

王直方詩話世弼詩慕韋應物而道麗奇壯過之

潘子真詩話世弼宦遊當塗時郭功甫尚未弱冠世弼愛其才薦于梅聖俞自爾有聲功甫嘗

賜曰數載汲引表二丈力也蒿埋三尺不敢忘其

茗溪漁隱叢話世弼年十七題百丈詩云瓊田  
收耙稬玉溜注琅玕讀書最苦因爾癯瘠歿時  
纔三十四歲自作墓誌有詩文十卷號遯翁集  
今不復傳

過金陵謁吳大帝廟

未冠時作

人苦曹瞞虐天悲漢祿終山河分鼎峙氣象發江東一  
旦墟京國彌年秦幼冲炎精竟灰燼紫蓋出艤艫長策  
資公瑾雄才得呂蒙招延師友義繼述父兄忠舊府幾  
雙闕驚濤涌半空風雲龍虎勢日月帝王功地力因時

險神謀與意通屈伸思所濟逆順審于衷駿足並交貨  
靈牙耀即我同盟界函谷獨斷保蠶叢定霸葵丘劣推  
心建武同長沙兆生識典午賴餘風戰守遺蹤在登臨  
四望中陵遷成萬古世異想羣雄歌舞居民祀干戈逐  
虜功征帆來浦外久客悵途窮精銳銷孤劍飄零若斷  
蓬徘徊靈廡下暮葉亂江楓

苔溪漁隱叢話

題劉仁瞻畫像

陣前仙琰生無愧鼓下蠻奴死合羞三尺吳縑暗塵土

凜然蒼鵲欲橫秋

苔溪漁隱叢話王旆遊金陵昇元寺見僧房壁上有繪金紫大夫題詩云云不能解卷畫歸示其父平甫曰此劉仁瞻像表世弼詩也此詩俊拔可喜裨寶呼瑣哀誤呼也

贈郭功甫二絕

從來多病王僧祐自小能文謝惠連各厭塵勞思物外  
莫辭攜手訪林泉

雪後姑溪水更深冥冥寒雨作連陰旅懷未可頓消遣  
思與洛生溪上吟



茗溪漁隱叢話荆公居金陵為功甫手寫所賦詩一軸有此兩篇世弼贈功甫詩也

### 贈功父

方山憶共汎金船屈指于今五六年風送梨花吹醉面  
月和溪水上歸韉浮生聚散應難料末路窮通盡偶然  
欲問故人牢落事鹿裘深入白雲眠

王直方詩話王介甫嘗手書此詩

### 臨終作

青靄千峯暝悲風萬古呼其誰挂寶劒應有真生芻皎

月東方隕長松半壑枯山泉吾所愛聲到夜臺無

詩人玉屑

謝景初

景初字師厚絳子慶厯六年進士官大理評事  
出知餘姚縣多惠政屢遷益州路提點刑獄以  
屯田郎致仕黃山谷其壻也有宛陵集

王直方詩話謝師厚方為其女擇對見黃山谷  
詩曰吾得壻如此足矣山谷之詩卒從謝公得  
句法有詩曰自往見謝公論詩得濠梁  
天中記紙以人得名者有謝公有薛濤所云謝  
公者富春謝司封景初創箋樣以便尺書因以  
為名謝公有十色箋深紅粉白杏紅明黃深青

淺青深綠淺綠銅綠淺雲十色也

觀餘姚海氛

海上風與雨未朕先氣升澤鹵雜山雲翳鬱相熏蒸交  
語面已障安辨丘與陵衣濡帶革緩臭腥殊可憎自非  
昌其陽疾癘得以乘君子卻陰邪何必醫師能

法喜堂

虛堂庇風雨結構不務壯外飾無髹彤置物況容長開  
篋藥劑靈拈碁白黑抗階花淡亦天庭石碧交向出門

鳥雀喧燕處物我喪吳俗夸有素佛徒侈相尚獨能守  
質靜坐以矯流宕棲之果自喜何須山海上

以上宋文鑑

石谷亭飛瀑

落泉下峭壁陡絕千萬丈濺急雪片飛望若匹練廣曲  
嶺隔青林三里已聞響其傍有巨石平潤可俯仰愚俗  
所不道我輩數來賞須期秋色清攀蘿將爾上

會稽志

句

倒著衣裳迎戶外盡呼兒女拜燈前

後山詩話謝師厚廢居于鄧王左丞存其妹壻  
也奉使荆湖枉道過之夜至其家師厚有詩云  
云

宋詩紀事卷十六

欽定四庫全書

宋詩紀事卷十七

錢塘厲鶚撰

強至

至字幾聖錢唐人慶歷六年進士刻苦攻詩韓魏公甚重之官祠部員外郎有集

墨蟹

瑣瑣江湖中忽在幽人壁短螯利雙鉞長跪生六戟骨眼驚自然熟視審精墨初疑蟪穴束猶帶浮泥黑橫行

竟何從躁心固已息終朝牆壁閒頗有肥霜色我來空  
持杯左手莫汝食誰奪造化功生成歸筆力

蟹略

賈麟自睦來杭復將如蘇戲贈短句

春風那復繫狂游朝醉桐江暮柳洲大手千篇隨地埽  
一身四海逐雲浮榮名不落閒宵夢退築聊為晚歲謀  
老橘殘鱸猶有興片心還起洞庭舟

瀛奎律髓

句士良

士良成都人慶歷六年進士